



KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

15 Février 2019

09 Jamadi'ul Aakhir 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

BANE ZÉNESS DE L'UMMAH EN DANGER

Bane pratiques libérales ki faire sans aucaine la foi ni sans aucaine la loi dans sa l'époque moderne là, sous l'influence de bane dimounes de bane pays Occidentaux et de bane Américains affecter principalement bane jeunes. Si sa frange de la société de bane non-croyants là pas gagne tellement tracas de bane méfaits (mauvais actions), dégâts et bane les autres problèmes majeurs ki causé par la mondialisation, bane zéness de l'Ummah, par contre pas capave, et faudé pas reste indifférent à zot l'influence, zot façon de vivre, zot façon d'agir (c'est-à-dire, sa bane mauvais pratiques de l'Ouest là). Et surtout faudé pas zot laisse zot influencer par zot mauvais l'effet, ene l'effet destructif ki li cause à nous bane zéness zot la foi et zot piété. Là, li vine inquiétant.

MISSION DE BANE ZÉNESS

Nous bizin rappel ki la zéness zot représente l'avenir. Pour zot tous, sans exception. Bane nations, bane pays, bane organisations, bane communautés, la famille. Zot tous dépende de la zéness actuelle pour prend la relève de demain. Sa

li pareil concernant bane zéness musulmans. Bane zéness de l'Ummah, dans quatre coins de la terre. Sa bane zéness là ena ene mission : Prend la relève de bane aînés, contigné propage le *Sahih al Islam* (le vrai Islam) dans la droiture, construire bane centres d'éducation pour bane zenfants et bane adultes. Mais surtout, pou communiquer et fer camarades (agir couma bane frères) avec bane membres de bane les autres communautés. Parski li bien clair, d'après bane versets Quran et bane Hadiths ki le respect envers nous prochain forme partie de la piété.

C'est à travers sa respect envers zot tous ki sa bane zéness là, ki représente bane piliers de demain, pou capave construire bane bases solides pour ki l'Ummah, capave vive en paix, en sérénité, en toute tranquillité, en harmonie. Mais selman bane zéness de sa siècle là pé passe par bane moments difficiles avec la montée de la mondialisation ki touche tous bane coins et recoins de sa lé monde là.

L'EMBARRAS DE BANE ZÉNESS

Sa situation là embarrasse vraiment bane zéness de l'Ummah parski zot paraite coincé entre deux difés (situations) : (1) Ena le principe de l'Islam ki faire la différence claire et nette entre saki licite (*Halal*) et illicite (*Haram*) ; (2) Ena ene la liberté sans borne (sans limite) ki pé arriver dans tous bane zaffaires de sa le monde ici-bas là, parmi bane non-croyants.

Bane zéness musulman senti zot embarrassé. Vrai même sa ? Mais, anou pose nous-mêmes alors sa question là : kot ena vraiment l'embarras pour sa bane zéness musulman là ? Ene simple exemple, pour faire plaisir pendant période de bane festivités de fin d'année, bane « party » (fêtes) organisé dans bane compagnies et même dans bane départements de secteur public (gouvernement). Zot tous faire zot ene devoir pour être présent, à cause étiquette (dans travail) oblize zot pou vine dans sa bane fonctions là. Bane zéness de l'Ummah, si arriver zot pas ferme dans zot la foi (*Imaan*), zot laisse zot facilement influencer par zot bane collègues pou prend ene ti verre, ene ti la santé (pou consomme l'alcool), et sous l'influence de sa bane dimounes là et l'atmosphère là aussi, sa bane zéness musulmans là laisse zot convaincu pou danse ene tigitte aussi, et pour participe dans bane actions ki totalement illicites (*Haram*). Et zot alle faire bane les autres kitchoses par la poussée de sa bane là pou faire bane tels kitchoses ki mette en péril la foi même de sa bane zéness de l'Ummah là. C'est sa l'embarras de sa bane

zéness de l'Ummah là. C'est sa l'embarras ki zot bizin faire face : sois suive bane préceptes de l'Islam ou sois tombe dans le bain de *Haram* ki zot contactes non-musulmans invite zot pou essayer, kot dans zot essayer, zot alle tassé, et zot pas capave sorti de sa ! Et alors, zot honté de zot la foi musulmane, et zot commence comporte zot couma bane non-musulmans.

LA DROGUE ET BANE LES AUTRES INTOXICANTS PÉ TOUYE NOUS ZÉNESS

Mo dire zot franchement, ici à Maurice, dans nous ti l'île, la drogue pé faire ravage. Bizin sensibilize bane jeunes de tous bane communautés (et surtout bane jeunes musulmans) contre la drogue. Faudé pas ki la drogue, l'alcool, cigarette et bane jeux de hasard fini nous bane jeunes. Bizin conner couma tout sa pé détruire nous communauté. Allah (swt) dire dans Quran Shareef :

« Ô ou ki ena la foi ! L'alcool, le jeu de hasard, sacrifices lor l'autel, flèches (pou faire la raffé), tout sa bien malpropre, travail Satan. Écarte ou de zot, afin ki ou prospérer. Satan oulé mette l'ennement et la haine parmi ou avec l'alcool et le jeu, et empêche ou rappler Allah et accompli *Salaat* (la prière). Alors, eski ou pas pou arrêter avec sa ? » (Al-Maida 5 : 91-92).

C'est ene cercle vicié ki piège bane jeunes pour ensuite touye zot. Et sa commence par ene tiguette l'alcool et cigarette. L'alcool donne zot soûlaison et ene sentiment de vide et de déconnection avec sa le monde là ki dans zot lizié paraite ene le monde rempli de problèmes pour zot. Et cigarette donne zot ene sentiment de liberté et de masculinité, kot zot senti zot couma bane MEN. Mais malheureusement, c'est pas zis bane ti garçons et bane adultes - z'hommes - ki victimes de cigarette et bane les autres intoxicants azordi jours. Bane tiffilles et bane madames aussi zot fine rentre dans sa même piège là. Pour senti zot égales à bane z'hommes, zot pas hésiter pou comporte zot couma bane z'hommes, même si zot bizin suive sa bane z'hommes là dans bane pires vices (ki péna so tourne-à-vice).

Et alors, ene ti boute cigarette (ene ti damme) vine ene cigarette, ensuite ene paquet cigarettes et bien plisse encore (2 paquets, 3 paquets, aller même). Kan zot pas gagne autant plaisir ki zot oulé dans cigarette, bane zéness tombe volontairement ou involontairement (à travers bane pièges ki zot bane groupes camarades et bane les autres dresser pou zot) dans la boisson alcoolique. Ene ti

verre (topette) vine ene bouteille en entier, ziska séki sa bane zéness là vine soulard et accro à la boisson. Li pareil pour la drogue ! Kan sa bane zéness là rode gagne ene ti « *Nissa* » (plaisir), zot alle goûte la drogue. Bien sûr, sa zéness là li aussi piégé par bane groupes de so bane camarades, soi-disant camarades (pas bane vrais camarades), et alors zot tombe dans la drogue par ignorance, kot sa bane fausse camarades là faire traite avec zot et piège zot dans la drogue.

LA DROGUE SYNTHÉTIQUE

Que ce sois volontairement ou involontairement, la zéness fine brizé, fine fini par la drogue, parski astaire li fine vine accro à sa bane substances ki faire dimounes reste accro (addicte) avec zot, et par la suite sa bane la drogues là touye zot. Ene ti dose la drogue, pareil couma *Cannabis/ Marijuana/ Gandia* par la suite vine ene dose pli fort, et même kan sa pas assez fort pour drogué là, li alle acheter bane les autres la drogues pli fort, couma héroïne et maintenant bane la drogues synthétiques.

Mo faire ene l'appel pressant à bane l'autorités et au gouvernement. Beaucoup de nous bane jeunes ki dans bane établissements scolaires zot pé prend bane la drogues synthétiques et bane les autres substances. Même bane z'élèves ki âgé de 12 à 13 ans ki fine fini l'école primaire et ki rentre en première année dans bane collèges trouve zot victimes de la drogue et bane les autres intoxicants. Zot commence fume cannabis/ Gandia.

La zéness de l'Ummah aussi fine rentre dans caravane de la drogue. Azordi zours, la drogue synthétique pé faire ravage partout dans tous bane coins et recoins de l'Ile ; li ene poison ki pé fini nous bane zéness.

D'après bane recherches ki mo fine faire, mo fine appranne ki la drogue synthétique li pli pire ki l'héroïne. C'est vrai ki bane l'autorités fine fer ene bon travail – pas mal de saisies de drogues de tous kalités. Saki mo espérer c'est ki le travail de nettoyage li bien faire, li genuine (authentique), et ki tout sa li pas ene mise en scène pour faire croire ki travail là pé bien faire.

Anou considère le cas kot le gouvernement li vraiment concerné par bane méfaits de la drogue lor nous société et surtout lor nous bane jeunes. Si bane autorités pas ti saisi tous sa bane la drogues là, kot nous ti pou été ? Ki ti pou arrive nous

bane zéness? Dans les années 80 (1980), « *Brown Sugar* » ti faire bocou ravages et ene papier ti pé vender Rs. 10. Azordi sa coôte Rs. 250. De ce fait, ene toxicomane (ene drogué) bizin trouve Rs. 1000 pour ki li capave paye so bane doses quotidiens. Pour sa, ena plusieurs cas de vols avec violence, tous les semaines, ainsi ki bane crimes.

La criminalité li en hausse de nos jours. Ena Meurtres. Ena vols avec violences. Plusieurs dimounes ki fine être victimes de vols avec violence vive dans la peur. Zot témoigner ki zot népli en sécurité, même kot zot. La drogue synthétique, saki mo fine appranne fine paraite lor le marché local depuis 2013. Le produit de base vine de la Chine. Li mélangé avec bane les autres ingrédients. Le dosage et bane ingrédients varié d'après bane pays.

À Maurice c'est bane Cannabinoïdes de synthèse (Cannabis synthétique) ki servi. Ena bane dimounes ki dire ki dans la drogue synthétique ena aussi bane produits pou touye lé-rat (bane anti-rat/ poison lérat). D'après bane recherches ki mo fine faire, c'est bane feuilles secs spécifiques ki ajouté à ene solution (ene solvant). Si ajoute ene anti-rat là-dans, alors saki garanti, c'est la mort ! À Maurice, sa mélange là faire de façon artisanale. Penser ki ene ti paquet (ti pochette) coôte à peine Rs. 100 ! Bane adolescents capave facilement paye sa avec zot pocket money parski prix là trop abordable. Et si zot manque l'argent, alors zot capave facilement réunir sa somme là (Rs. 100) entre cinq de zot camarades (kot sakaine contribuer Rs. 20) et acheter sa marchandise mortel là. Zot capave gagne ene ou ziska sept taffes avec sa.

D'après ene rapport, ki vine du centre Idrice Goomany à Plaine-Verte, bane dimounes ki vine dans sa centre là pour traite zot addiction à l'héroïne ; lor 100 dimounes, 70 fine goûte la drogue synthétique. Penser ene coup ! Plaine-Verte li ene région purement musulman. Li malheureux ki même bane zenfants et bane adultes fine rentre dans piège de la drogue synthétique!

L'effet de la drogue paraite éphémère, paraite de courte durée. Mais c'est pas le cas. Bien ki li procure à bane jeunes ene bref instant de plaisir, mais so bane séquelles bien nombreux. Kan zot sorti de sa l'état là, zot dans ene l'état de manque. Saki pousse zot pou alle rode encore la drogue. C'est ene phénomène mondial et bane barons (mafias) de la drogue comprend sa très bien. Zot conner

ki sa bane là pou vine accro (addicte) avec sa bane produits là et zot profite lor là pou faire l'argent par milliers/ millions/ billions.

Bizin faire ene l'étude sérieux lor bane raisons et bane circonstances ki pousse bane jeunes pou droguer. Pas uniquement la drogue synthétique, mais lor tous bane la drogues. Mo fine lire dans ene journal kot fine mentionne cas ene zenfant de 9 ans ki ti pé droguer avec la drogue synthétique. So mama ti sous méthadone et so grand frère (frère aîné) ti pé piquer (droguer par seringue). Penser ene coup, 9 ans ? Guetter couma nous société, nous bane zenfants pé déperi!

Faute de temps, mo arrête ici pour aujourd'hui. *Insha-Allah*, mo pou ré-vine lor sa sujet bien important là vendredi prochain. Ki Allah aide nous pou sauve nous bane jeunes de tous bane calvaires et pièges de la mondialisation. Ki Allah aide nous pou éduque zot de façons efficaces et ki bane la drogues et bane les autres mals vine nek ene mauvais souvenir – quoi-ki sa bien difficiles pou réaliser mais li pas impossible. Ô Allah ! Nous Ummah ! Nous Ummah ! Protège l'Ummah de To bien-aimé Muhammad (saws) contre tous bane dangers. Protège so la foi, so la piété et so bane zéness contre bane la trappes de Shaytane. Ô Allah, protège nous, et guide nous touzour dans le droit chemin, et aide nous pou aide nous prochains dans bane meilleures façons possibles. *Insha-Allah, Ameen.*